

蕉

軒

隨

錄

蕉軒隨錄序

自釋官之職廢而說部始興
唐宗以來美不勝收矣而其別
則有二穿穴罅漏爬梳纖悉大
足以扶經義傳疏之奧小亦

以窮名物象數之源是曰考訂
家如客齋隨筆因樹屋紀聞之
類是也朝章國典遺聞瑣事
鉅不遺而細不棄上以資掌故而
下以廣見聞是曰小說家如唐國

史補北夢瑣言之類是也作
者朋興更相出入編書者第從
其多以歸其類而大綱既定罕
出範圍至於立言垂訓卓然自
必其可傳必第視乎其書而不

繫乎其體同年觀察方君子
嚴幼承家訓淬厲於字自其
束髮受書即能翻前人窠臼
抉其幽隱其心有所得見有可
喜必筆而錄之既而侍直

禁林橐筆天祿石渠之地凡

史家所載

大聖人所以擅恩威而昭法戒

者可驚乃愕又備錄而歸積之

歲月遂來巨帙歲戊辰分述

嶺西期年政成乃盡發其藏
刪繁舉要編成如十卷名曰
蔗軒隨錄而命光廷爲序嘗
讀易曰君子多識前言往行以
畜其德而夫子教人上曰多聞擇

其善者而從之多見而識之學
不貴博乎式願學博矣而識
不足則無以剖析其精微識足
矣而才氣柔弱筆不能自達又
無以擅文章而傳達近君搜羅

既富排比皆中法度之謂善書
矣顧猶有說者 國家混一宇
內以節儉先天下府庫所儲海
盈而山積一遇軍興水旱則又
廣籌經費以實名省之藏故

朝廷日以風節厲天下而小人即風其間侵吞剝蝕或數百萬或十萬相沿既久牽染且日衆雖有潔清自好之士不能起
瑟縮罔敢舉發賴

天子神聖往々於無閼章奏洞
燭其奸雷厲風行朝發而夕斷
駢珠玉數十輩人始知有國法
而司農得以舉其籍今官方
淫敘大法而小廉者皆

列聖整齊嚴肅之所治謀也
最陝甘之冒賑淮揚之侵帑
少時父老類言之而不得其首尾
及君書一出則當年之始末
罪之輕重歲時日月燦然具

左使後之讀者據是以參校

國史實足以傳信而祛疑凡類

此者數十篇其有傳無疑也若

左讀書之間搜典之僻獨抒

所見皆能開拓心胸而得者既

多爭者上起昔吳席臣著
能改齋漫錄劉興伯糾其十
一事顧亭林積畢生之力成
日知錄經閫百詩舉正尚五十
餘條入王士禛近今未經論

定以光廷之謗陋誠不敢自
任折衷此須俟諸百年而要
不爲無補耳君功名方大起
而著述不輟是書而外復箋
註其先元英集朱子詩集及

二程粹言直解隨園詩註年
譜刻以問世後此所出當有
如昌黎所云大書屢書不一書
者故既序以應命又執筆以
俟焉同治十一年四月八日

治年愚弟番禺李光廷序

蕉軒隨錄卷一目錄

汝居稷

贛州府署楹帖

太必免

國書十二字頭

習坎

木中現進士二字

黃州謝上表

協辦內閣事

雷同被黜

楊介坪中丞

校對責戍詩

宋明兩太祖畫像

一生不笑

家玉屏先生

陳文愍公

卓椅机凳

完白山人寄鶴書稿

寢衣

帝王淫亂

瀛臺設宴

魏廓園先生年譜

李仲達先生就逮詩

賢母賢相

黃袍

側室授封

三元皆安徽人

有車
偽稿案

惜抱論詩

戊辰召試

重榮樹返魂梅

許抑齋

半園主人

植桂圖

皖省山名

鍾馗

徐太守祭先世父文

論耶穌教

國子

政由葛氏

容甫書函

管夫人畫卷

歛肩

豔領

蕉軒隨錄卷一

定遠方濬師子嚴

汝居稷

舜典帝曰棄黎民阻饑汝后稷播時百穀蔡沈集註后君也按堯使棄居稷官更國邵地遂封棄於邵號曰后稷劉向撰列女傳謂姜源生子棄好種稼穡堯崩舜卽位乃命之曰棄黎民阻饑汝居稷播時百穀其後世世居稷云君申命於臣似不必稱其爵土之號漢去古未遠向必有所據則后字當作居字爲是且堯之使棄

亦使之居稷官后與居字形相仿其爲錯誤無疑閱鄭
註亦作居字阮郎中福序向所撰列女傳最詳

贛州府署楹帖

寶坻李公

光先

吾師滋園先生之尊人也乾隆戊申科

舉人由工部郎出守江西贛州循聲卓著爲政不尙苛
刻嘗題贛州府署大門楹帖云禮防於未然惟願人人
自化弊去其太甚無庸事事更新存心如此宜其熾昌
厥後也

太必免

康熙丙午相國馮公

溥

官吏部侍郎時四大臣欲各省

差大臣二員設衙門于督撫之旁以廉督撫吏部滿尙書阿思哈侍郎太必兔議設衙門於各省東西一切書役蒯隸人員聽其招募頒與勅印先生執不可謂創造衙門費將不貲內之傷度支外之勞民力毀房壞屋勢必不免且國家設立督撫皆係重臣今又不信復遣兩大臣實逼處此東西相望而稽察之甚無謂也夫權太重則勢相軋勢相軋則當之者碎保無下屬仰承左右譏苛爲民害者太必兔蒙古人性暴無禮聞先生語大

有車馬
志瞋目起立張拳向先生先生徐應曰雞肋何足安尊
拳爾我也既係公議何必不容吾兩議耶且議之可
否自有

聖裁豈爾我所得而專主疏上

上是先生議其事得止其後太必免反修好每事就先
生商酌然終以夤緣得官伏誅語詳毛西河所撰馮益
都年譜

國書十二字頭

乾隆十五年五月奉

上諭我朝創制國書分十二字頭簡而能該用之無所
不備而音韻尤得天地之元聲惟是漢人初學清字者
辯字審音每借漢字音註以便記誦而漢字不能悉叶
不得已各從俗音以意牽合未經校正畫一將恐久而
益差閒嘗讀漢字金史其用漢字音註國語者本音幾
不可曉諦尋之則原清語所常悉又如元史之達魯花
赤以今蒙古音譯之當爲達魯噶齊不華當爲補哈此
類未易枚舉在史氏或以己意爲音或出於當時承習
蓋由以漢字而註清語蒙古語既非本字又無一定是

以訛復傳訛以此知官爲較定之不可以已也夫一天
也國書謂之阿補喀蒙古謂之騰格哩西番則謂之納
穆卡至國書之騰格哩則漢語所謂絃子耳又如一日
也國書謂之舜漢文謂之曰蒙古謂之納蘭西番謂之
尼嗎又如國語呼爾者其音爲西而西方則稱幹呼基
此在兼通清音漢文者無所疑義而通清不通漢者但
知西之爲爾通漢不通清者但知西之爲西而語之以
幹呼基且不知爲何物矣蓋凡物之命名本屬後起爾
雅釋名方言土訓莫可殫悉皆假象耳若夫以漢字註

清文實假象中之假象而必執此以較是非定高下寓褒貶此特私心妄見耳爰命大學士傳恒率同儒臣重

定十二字頭音訓開章六字則用直音如阿額伊鄂烏

謬餘用二字合音如納訥呢儺努懦其餘十二字頭首

六字用二字合音如阿額伊鄂烏以下俱用三字合音

如襲襲襲襲襲襲以分輕重緩急而國書之元聲畧可

得梗概是不過同文之一端無關奧義然習之於童蒙

之始有不容忽者用申其義傳示久遠俾知所法守焉

特諭謹按西域同文志二十四卷增定清文鑑三十二

卷補編四卷總綱八卷補總綱一卷滿洲蒙古漢字三合切音清文鑑三十三卷皆經

欽定條分縷析貫串精詳余官京朝時曾與滿洲友人精習繙譯者時加討論惜心計粗鈍究未能一一體會也

習坎

六十四卦名皆無卦上加字者坎卦獨加習字或云習上有坎字蓋坎卦名習坎卦義也程子易傳習謂重習他卦雖重不加其名獨坎加習者見其重險險中復有

險其義大也按郭雍易說孔氏正義云以坎爲險難故特加習名王原叔先生引徐氏新義謂習坎字上說卦名一坎字而易中卦名之下亦无重言卦者故離卦不曰離重離巽卦不曰巽重巽其重言卦名者皆孔子彖辭也或者曰本無習字緣坎卦六畫漫滅正如習字故傳寫者誤以漫滅之卦畫爲習字又于上添畫一卦是坎字上十二畫矣然雖以習字漫滅觀之僅有六畫之象如此則其誤在隸古旣出之後而彖象皆已先言習坎則此說又非矣大抵坎加習字學者思慮終不能得

不可更附會穿鑿也坎離等六卦卦辭并彖皆只以三畫取義坎以剛中而實故稱有孚心亨有剛中之德者未有不能濟難也故行有尙如頤大過噬嗑中孚之類皆六畫取象者也坎以三畫取義是一卦之中其象再見故云習坎豈乾坤不可稱習而六子之序始于坎故坎獨稱歟其義則六卦俱有之矣疑當闕之未可深辯也所論甚當後之說易者無此明晰也

木中現進士二字

沈存中筆記云杭州南新縣民家析柿木中有上天大

國四字筆法類顏真卿并云木中有文皆是柿木咸豐
辛亥建德張硯秋刺史子錫康於柴薪中拾七寸許木
生成陽文進士二字刺史尊人繪童孫獻瑞圖廣徵題
詠余在東流時曾親見之兵亂圖木俱付灰燼刺史賦
滿江紅一闕志之詞曰佳木成文曾一笑童孫攜到想
箇裏奇緣應是春闈先兆照眼光生銀畫細繪圖珍比
金鉤繞記同人咳唾落珠璣皆高調 纔認取奇材好
怎付與狂灰掃歎茫茫春夢去來誰曉霄漢佇冲雛鳳
翼丹青重寫科名草莫輕教韻事就銷磨傷懷抱

黃州謝上表

王禹偁爲知制誥坐事責守黃州謝上表有宣室鬼神
之問豈望生還茂陵封禪之書惟期身後之語真宗覽
表驚其詞之悲方欲內徙會黃州境有二虎鬪而食其
一占者以爲咎在守土之臣遽有旨移守蘄州以避其
變勅下而禹偁死矣此見魏泰東軒筆錄所記後見彭
文勤公所編宋四六選有禹偁在黃州謝上表并無此
一聯或別有一表未傳耶抑節錄未全登耶姑存以志
疑吳處厚青箱雜記云是徙蘄州謝上表按蘄州勅下

禹偁已死焉得有謝表耶

協辦內閣事

協辦大學士兼管總督者不必仍帶協辦銜見乾隆十三年邸抄大學士張廷玉 恩准五日一朝協辦大學士陳大受因病調理漢大學士惟史貽直一人需員協辦尙書汪由敦暫在內閣署理見乾隆十四年邸抄

雷同被黜

乾隆壬子江南鄉試首題爲舜有臣五人而天下治武王曰予有亂臣十人桐城家勿菴先生諸文格老識高

主司已定元及搜落卷得常字四十號與先生文無一

字異遂被黜先生始終未得一第以明經終惜哉其同

里光君

石均

跋先生文云方君墨卿

先生別號

以詩文馳聲

藝苑凡吾鄉工爲文者咸慕師之謂足繼百川靈臯兩

先生而起家貧授徒鳳穎間錄窗課十餘篇爲諸生程

式蓋有年矣壬子省試因窗課首藝有此文不復重構

主試亟爲歎賞乃以常四十號復抄襲是文魯鼎之投

真僞莫辨而方君遂被落同人刻其遺卷俾世之愛惜

斯文者知衡鑑之公與先生暴腮之故故在於此

云云

昔歐陽文忠任滑州時宋子京謂公曰某大官頗愛子
文文忠遂授以近著十篇後文忠知制誥人或傳有某
大官極稱一邱良孫之文章文忠使人訪之乃前日所
投十篇良孫盜爲己文以贗而稱美之者卽昔日子京
所示之某大官也文忠不欲斥其名但大笑而已以贗
亂真古今一轍科名有命當付之達觀可也

楊介坪中丞

憶幼時曾記吾師楊壬生先生

若午

言先生之叔父介

坪公

惺曾

以辛酉翰林開春坊受知

仁廟爲大理卿最久道光初開府楚北風骨錚然薨後
猶荷清名夙著之

褒嘗被

召值天暑公方掀簾見

上搖扇揮汗卽入跪

上將扇子卻在座右不復用

問公事甚詳良久熱甚

上面汗如雨竟不用扇又久之乃出公已溼透紗袍矣

我

朝君臣相見嚴重如此謹恭錄而識之

校對責戍詩

嘉慶間恭修

高廟實錄校對官吾鄉龍子嘉駕部

汝言

杭州顧渚茶

中翰

英

暨某公與焉每藁本成必敬謹恭校恐有訛錯

未幾進呈

御覽之本誤落甚多並將

高宗廟號純字亦誤書

睿皇帝震怒將以大不敬論諸校對皆下刑部總裁爲

長白英公江西陳公俱革職待罪龍公等三員旋發新
疆効力適未多日姚伯昂總憲業開坊以大考三等降
編修朱詠齋尙書開列名次並不在先忽擢春坊京師
有好事者合而成詩曰這回提調太荒唐斷送英陳兩
侍郎出口可憐三校對碰頭空惱八親王某王曾爲乞
恩故邀寬典
一封槭奏推鄉相五月還官笑伯昂開列儘先都是夢
詠齋今日竟春坊讀之令人失笑

宋明兩太祖畫像

宋太祖微時游關中寺僧嚴老常周之往來無倦陰異

其骨氣使工人貌之繪事本褐衫青巾後易靴袍明太祖本句容人遷徙濠州今鳳陽府也少年窮乏爲皇覺寺僧神常示兆御極後遂改皇覺寺爲龍興寺在府城外三里佛堂中供太祖像幅長丈餘神采勃勃現紙上寺僧尊藏惟謹不肯輕出示人凡游客取觀者皆今畫師所摹擬也近年粵匪破鳳陽僧某負像逃流離數省亂後復歸像得無恙豈高皇帝之陰靈有以呵護歟惜宋祖之像未知仍在關中否

嚴老名守嚴見邵氏聞見錄

一生不笑

魏艾陵伯萇一生不笑雖逢吉慶未嘗開口見魏書

家玉屏先生

先生諱永爲五世祖奉政公從兄博學工詩尤精書法
晚年僑寓江甯遨遊三山二水間卒遂葬焉濬師曾在
荒肆得先生素紙書一幅自錄雨齋漫興詩詞翰雙美
時尙童稚不識收藏今不知尙在荒篋中否也僅記其
詩曰雨圍柳絮成乾雪香繞簷牙墮溼雲又是舊來雙
燕子隔年離別語殷勤蕉窗憶及敬錄於此

陳文慤公

濰縣陳文慤公

官俊

嘉慶戊辰進士吾鄉楊介坪公會

試分校所取士也入翰林後侍學

三天時

宣宗尙在潛邸獨喜公公亦知無不言故

登極後公之恩遇最隆屢以事罷而復起道光己亥公
已工部尙書矣未幾復因事罷旋

授通政使至乙巳遂拜副相初文慤同年錢金粟學士
林人號爲冥官一日文慤與學士言人稱君掌冥司職
能預知人富貴君識我將來爲何官耶學士應聲曰吏

部尙書協辦大學士文懋以學士爲戲語也至己酉文懋果以協揆長吏部竟終於位奇哉文懋入相時太夫人尙在堂先世父屬先資政代作賀啟中云天官掌六卿持衡聿班三事 帝命協百揆作相已遲十年又云袞衣依日月之光知遇荷 九重天子萊服煥星辰之采歡欣有八座慈親公喜甚每於家兄前稱述之

卓椅机凳

周祈名義考天子諸侯席有黼黻純飾凭則設几今俗言椅以代席也言棹以代几也棹椅本無此字乃俗書

正字通俗呼几案曰棹李義山河陽篇詩云憶得鮫絲

裁小卓蛺蝶飛迴木棉薄此卓字之見於詩者宋史輿

服志有靠背椅真宗咸平景德中主家多造檀香椅卓

椅作倚

此椅字之見於史者

按默記藝祖初命徐鉉往見李煜老卒取舊椅子相對鉉

謂卒曰但正衙一椅足矣頃李王出下堦引其手以上徐引椅稍偏乃敢坐此見於宋初者易渙卦

渙奔其机家語仰視榱桷俯察机筵此机字之始方言

榻前几趙魏之間謂之施又俎机也西南蜀漢之郊曰

杜音賜杜肉机也後漢書樂崧獨直臺上無被杜食糟糠

又楮亦肉机音箸似皆載肉之器如詩有挾天畢載施

之行畢亦助載鼎實者與今之机案不同

儀禮宗人執畢鄭注狀如

又禮記彬禁似几屬然無足斯禁似几屬亦未能明言

其製作世說顧和外孫暝在几上几一作橙晉王獻之

傳魏時凌雲殿榜未題匠人誤釘不可下使韋仲將懸

橙書之比訖鬚髮盡白此几字之始

王弼州譏楊升菴孟光舉案以爲青

玉梳爲無據不知宋曾鞏耳目志載云孟光舉案齊眉

俗直謂几案耳呂少衛云按乃古梳字故舉與眉齊張

衡四愁詩何以報之青玉按卽青玉梳也據此則考工

記案十有二寸亦作此解爲當曾說如此豈可議升菴

爲無據耶潘師又按考工記諸侯享夫人案十有

二寸注十有二列也是案字當作梳字解無疑

完白山人寄鶴書稿

完白先生有上樊太守陳寄鶴書復自錄稿本一通筆

法蒼勁文亦如之道光庚戌先生喆嗣少白茂才

傳密

以此冊請先資政題識因得鈔一副本先輩文字獲睹
爲幸原文甚長節錄於此完白山民鄧石如頽首奉書
爲啓陳寄鶴事此鶴之主人閒有歲月可證者已百三
十有零歲歷公卿之門四據宛陵張涵齋太史燾古鶴
行詩滇南中丞孫公曰秉刻之金陵藩署中叙此鶴先
在常熟蔣家次居吳興沈家後歸德清徐家京口農部
袁禮堂以千金聘歸三十六峯山館中此百三十有餘

歲可屈指而計者其前之歲月則不可得而考矣山民
游於袁公家有年農部之子廷極命鶴謂山民曰此爾
主也謂鶴與山民宜遂以贈山民山民年垂耳順得此
爲老伴洵曠事也嘉慶元年秋舟過金陵孫中丞悅之
欲聘山民鶴兼以灰鶴二贈山民此海雀也非鶴也與
鶴爲奴鶴不受也卻之載吾鶴歸山民家徒壁立食指
甚繁每一硯四方以活妻子恐鶴遭野人之厄遂擇地
而寄鶴於集賢閣僧舍中雖禪室荒陋而林木蒼鬱竹
樹交翠關隘險固山石嵯峨爲達天衢之衝要道又皖

城龍脉所特起僧欲仗佛力剏興之以扶持行道培護
風水其志誠深遠矣離山民居遙不三十里擔糧飼鶴
月有常例雖待此鶴也亦隱以待僧矣因向僧喚鶴訓
而祝之曰爾乃胎禽浮邱著經雲門鼓翅華表飛聲負
霄漢凌雲之志恐終非貧家有也爾有遐心亦聽爾之
翱翔寥廓可不爾羈也今屬爾寄於僧以修爾齡僧託
於爾以輔成其名爾無負山翁寄鶴之意以徜徉於此
此地有修竹古木可庇蔭爾有古佛青燈可懺悔爾有
靈旛寶蓋可威儀爾有法座經壇可莊嚴爾有蹲獅伏

象可護持爾有蘿月松風可徘徊爾有山花野卉可紆
爾步有溪泉潺湲可濯爾羽有積石漫山可厲爾喙有
苔華繡砌可逞爾狂有高梧重重可張爾蓋有蒼藤垂
垂可排爾幢有鐘鼓鏗鏘聲可遂爾海嶠搏風盤礴乎
青雲之志有風雨草木搖撼聲可觸爾引領高唳若有
扞衛牧圉之任有山禽鳴噪聲可助爾羣下相融物我
熙熙共樂林泉之度有車馬行邁聲可慨其塵途僕僕
爾則梳翎戢羽矯首而游觀有冠蓋往來賢士大夫之
憩止可念其干旌在野載馳載驅長路迢迢趨日夕

益顯爾之清曠勁逸孑然而孤標凡山中四時之致雪
月花風之候陰晴雷雨之辰爾得默領其常變爾其欽
承吾訓辭又曰僧歸爾伴僧出爾守月白風清聽經點
首毋徒飲啄端潔毛羽他日太清衣裳楚楚豈不爾駕
騎爾遨遊賢無十萬難上揚州我居不遠於焉廿里爾
若懷歸龍山鳳水爾其諦聽吾祝詞祝畢鶴四顧惶然
若有逸志乃慰之曰爾來前爾其安於此矣鶴遂皈依
於佛雖皈依佛鶴仍爲山翁之鶴也僧擬其名余曰是
昂藏物非可以几名辱之也惟佛可以使之遂更其名

曰佛奴寄鶴之地莫此若也怡鶴之情莫此適也鶴耶
僧耶其相助爲理耶山民家無擔石儲前曾以十金助
僧剏寄鶴亭施茶以濟行人昨秋枯旱猶以錢十千佐
僧架此東軒今修竹萬竿清陰滿座過者可憑滌煩囂
也今聞僧言閣下花驄住此鶴舞階下從官稱慶以爲
官階一品之兆直指日事耳左右不察爰遣廝卒束縛
以去送至署中僧號於途鶴厄於卒不聞軒車之迎而
有囚繫之辱物之報人以嘉祥者顧身受如是之困乎
從此蓮幕賓朋競賞芸窗不聘之禽而使冷院枯僧曰

顏顏於寄鶴之山翁矣山民知閣下意萬不如是不過
近侍之人圖此以邀賞賚耳亦或梅開東閣暫借娛情
張瓊筵以咏花命羽觴而醉客不有曜曜之白鳥其何
足以暢此雅懷乘興招之盡興揮之則鶴不日仍歸山
民亦或政閒遐賞覩物懷人慕古人琴鶴之風以益勵
其清廉而光照皖國山民得爲治下之民亦與有榮焉
若徒手而有之山民能負袁郎中贈鶴之意乎亦負慙
於此鶴也且起外議謂太守奪山人鶴之名若以草野
冒瀆尊嚴而罪之則山民化鶴鶴化山民所不辭也故

歷陳古鶴之始末與僧人山民同此心事特用縷述上
陳不勝恐懼悚惶之至山民再頓又書後自記一則云
鶴壽不知其紀人壽修短極之不過百年均宇宙之寄
物耳此鶴寄於公卿寄於山民寄於僧佛又寄於太守
太守也僧佛也山民也公卿也皆寄於鶴耳鶴寄於人
耶人寄於鶴耶然人鶴之壽雖有長短不齊亦終當還
宇宙也於我何有哉余長年僕僕四方自有此鶴歸時
不過以爲耳目一瞬之玩究未嘗與鶴性靈相周旋也
作此書成用鶴戀鶴訓鶴祝鶴吾何得忘情於鶴顧此

雖亦無負於鶴而心中有不釋然於鶴者存書以存鶴
可謂有鶴而無鶴無鶴而有鶴也鶴兮鶴兮不待吾他
日碧水蒼山偕遊觀於冥漠耶奚去之遽也

寢衣

寢衣注孔安國曰今之被也說文被寢衣也長一身有
半廣雅寢衣衾韞被也毛詩疏今名曰被古者曰衾論
語謂之寢衣也自漢迄唐皆以寢衣爲被然從未作謹
齋之說管絨若先生作此文謂魯論記夫子必有寢衣
義自繫之於寢而不繫之於齋長一身有半是謂寢衣

之長視一身有半而非以半覆足議論絕大足破拘經之習先生自記云此論本之錢茶山尙書

帝王淫亂

七修類稿載帝王淫亂一則仍有未盡錄者爰補記之如晉文公納姪婦懷嬴衛庶子頑烝於宣姜靈公夫人淫於宋公子朝宋文公通於祖母襄夫人王姬衛宣納伋妻晉惠烝賈君鄭文公納叔父妃而生子臧甘昭公通於隗后共仲通於哀姜襄仲通於文公妃敬嬴宋武帝烝其母路氏廢帝淫其姑稱爲謝貴嬪狎其姊山陰

公主北齊文宣帝高洋汚其嫂且曰吾兄昔姦我婦我
今須報其弟武成帝亦淫之齊高祖高歡收魏孝帝后
介朱氏爲妃又其妃鄭氏生子馮翊王潤與妃同寢有
穢襍之聲他若曹丕之收父妾朱溫之姦子婦北魏張
祚烝其叔母馬氏及姑姊妹兄弟之子皆淫之蒙遜子
牧犍淫其嫂李氏兄弟三人傳嬖之嗚乎人之異於禽
獸者幾希

瀛臺設宴

康熙二十年辛酉七月

聖祖仁皇帝駐蹕瀛臺召大學士以下各部院衙門官員賜宴命內大臣傳諭慰勞賞賚有差乾隆十一年丙寅八月

高宗純皇帝亦設宴瀛臺先宴王公及近支宗親次宴大學士九卿京堂翰詹科道并准諸臣中入宴賦詩盛矣哉喜起明良之風於茲再見矣

魏廓園先生年譜

先生有自譜一冊云萬歷三年先孺人將坐蓐壁棟間火光熒熒先孺人以爲鬼燒不祥而火光緣棟上升至

脊梁正中而予生時先都諫睡夢中則又若見兩童子
執燈導一金冠緋衣少年者入臥室遽然起則聞予哭
聲矣時十一月十四日亥時也先生名大中官給事中
以劾魏闡事牽連下獄死忠義貫日月其前身豈偶然
哉

李仲達先生就逮詩

仲達先生

應昇

就逮詩有臣罪應難赦君恩本自寬二

聯此正合臣罪當誅天王明聖之意嗚呼若先生者可
以風矣

賢母賢相

公父文伯退朝其母方績文伯以爲歡之家而王猶績懼于季孫之怒敬姜則以勞逸之論訓之公儀休爲相歸見其妻織謂其妻曰吾爲相食祿今爾奪百姓之利使民安歸乃焚機以爲戒夫敬姜賢母也公儀休賢相也兩人之語孰是孰非

黃袍

趙氏因點檢之讖遂有志天下陳橋議起黃袍加身未及十朝而高宗南渡再傳至紹熙親崩不能執喪臨朝

一仆以太后旨立嘉王當嘉王之將立也聞命驚惶欲

走憲聖令知閣門事韓侂冑掖持使不得出嘉王連稱

告大媽媽憲聖也臣做不得做不得憲聖命侂冑取黃袍

來我自與他著侂冑從旁以天命爲勸王乃衣黃袍亟

拜見集紹翁四

祖開國運孫承大統上下百六十餘年

都被這一件黃衣若必待彊而後可余謂太祖之黃袍

固是假意造作卽寧宗之黃袍亦未必真意推辭顧太

祖任用趙普曹彬諸賢永綏國祚惜寧宗只專任侂冑

不免國家倒置根本剝喪未始非兆於此則八世孫誠

愧乃祖萬萬矣

側室授封

尹文端公側室張氏曾蒙

特恩封一品夫人隨園先生有啟賀之恭讀乾隆三十七年二月

諭旨于敏中之妾張氏於例原不應封但于敏中現無正室張氏本係伊家得力之人且其所生次女已適衍聖公孔昭煥長子孔憲培係應承襲公爵之人將來伊女亦可並受榮封張氏著加恩賞給三品淑人欽此此

等

曠典亦本朝所希有也

三元皆安徽人

平湖徐辛菴少司農

士芬

道光壬午爲江南副考官得

解元胡學博

國樑

甯國人甲辰典禮部試得會元焦錦

江大令

春宇

太平人是年秋復爲江南主試則解元林

遠村

之望

也係懷遠人咸謂少農與安徽人有緣信矣

僞稿案

乾隆十七年有僞作孫文定公

嘉淦

奏稿累萬言指斥

乘輿遍詆大學士鄂爾泰張廷玉徐本尙書訥親等傳
播遐邇事聞

上震怒飭各省窮治久不得主名復

命尹繼善來京隨同在京各大臣審辦始訛出盧魯生
劉時達等會商捏造實情奉

上諭各省傳鈔偽稿一案朕屢經降旨宣示中外此等
奸徒傳播流言其誣謗朕躬者有無虛實人所共見共
知不足置辯而譸張爲幻關係風俗人心者甚大不可
不力爲整飭乃各省督撫僅視爲尋常案件唯任屬員

取供詳解過堂一審卽爲歸案了事以致輾轉蔓延久
迷正線各省就案完結情形大畧不過如此而在江西
爲尤甚卽如施廷翰案之張三施奕度江西承審各官
草率錯謬及到江南亦不能審出實情幾認爲捏造正
犯經朕命軍機大臣等審明昭雪而千總盧魯生在江
西兩次到案俱彼狡飾脫漏又經軍機大臣從解京之
書辦段樹武彭楚白等供詞互異之處細加窮詰始將
千總盧魯生守備劉時達傳稿情節逐層究出比盧魯
生劉時達先後到京朕督令諸臣虛心研鞫反覆推求

始則借端支飾繼則混指同寅既不能推卸傳稿實情又不能供得稿來歷詰問再四卽各委之伊子忍心害理莫此爲甚迫情竭詞窮始得其會商捏造種種奸僞情節并將僞稿條款逐一默寫及其造謀起意於破案後商同借線揜飾情由一一吐露矢口不移當此光天化日之下乃有此等魑魅魍魎潛形逞僞實出情理之外今不待重刑供情俱已確鑿殆由奸徒罪大惡極傳鈔貽累多人好還之道自無所逃耳盧魯生劉時達著議政王大臣大學士九卿科道會同軍機大臣再行詳

悉研鞫定擬具奏至督撫爲封疆大吏不特此等大逆之犯卽尋常案件孰非民生休戚攸關而養驕飾僞妄自託爲敦體可乎此案若查辦之始卽行竭力跟究自可早得正犯乃粗率苟且江西舛謬於前江南迷悞於後均無所辭咎江西近在同城羣衛弁騰口囂囂毫無顧忌串供借線幾於漏網吞舟厥罪較重於南省解任巡撫鄂昌按察使丁廷讓知府臧振鷺俱著革職拏問交刑部治罪總督尹繼善及派往江西同問之周承勅高麟勲俱著交部嚴加議處錢度朱奎揚等尙與專委

承辦者有間俱著交部議處至衛弁乃總漕專責瑚寶亦不能辭責亦著交部嚴察議奏當日查辦之始未知根源所在須披葉尋枝勢不得謂法不及衆畏難中止以致顛預了事朕猶恐拖累者眾屢經密諭各省督撫分別發落以省拖延卽武弁大員曾經私看者亦悉置不問然在伊等食毛履土見此大逆不道之詞當爲痛心疾首譬聞人詈其父祖轉樂爲稱述非逆子而何然使非有首先捏造之人則伊等亦無從傳聞是傳聞者本有應得之罪不可謂彼所愚弄而朕則憫其無知譬

子雖不孝父不忍不慈今首犯既得不妨曲宥除在京人犯已予省釋外著傳諭各省督撫通行出示曉諭無論已未發覺概行從寬免究釋放凡屬此案例應擬罪人衆蒙朕格外寬宥務宜痛自改悔動尊君親上之天良戒造言喜事之惡習安靜守分庶不致良苗化爲稂莠永受朕保全愛養之恩夫讒說殄行爲聖世所不容奸頑不除則風俗人心何由而正而吏治徂于因循尤關治道朕宵旰憂勤與諸臣共相敦勉者豈肯稍存姑息致啓廢弛之漸將此一併宣諭中外知之欽此先是

御史書成不知大義所在恐株連多奏請罷查辦
上以書成身爲言官不能備悉原委遠方傳說更難保
其必無浮議褫其職蓋

上知外省姑容積習非明白追究無以正人心維風俗
也而斯案始終於文定一無所問云

惜抱論詩

惜抱先生云黃仲則詩讀之固亦有才然未爲絕出若
管生異日當或過之管生者管異之同也

戊辰召試

嘉慶十三年戊辰春

聖駕巡幸淀津特開

召試之典

御製賦得雨過潮平江海碧詩云巨浸涵新漲洪波浩
瀚盈雨收雲霧淨潮捲水平大海一泓湛長江萬里
晴翠奩浮歛澹碧浪晃晶瑩遠挹三山秀遙連四瀆清
淵渟接蓬閭澄澈達滄瀛透潤敷青甸餘霞建赤城濟
川欣作楫繼起望羣英

御製詩註國家闢門籲俊務博其途卽巡幸所蒞省分

舉行召試之典頗爲得人今朝列中如戴衢亨卽乾隆丙申我

皇考巡幸天津所取一等二名士也茲伊已渥荷

兩朝恩遇洊用至戶部尙書協辦大學士且每日趨直
樞廷宣綸出諭堪稱任使茲予以閱視河隄要工蒞臨
駐此亦舉斯典惟冀爾多士中有能自砥礪繼起有人
爲異日作楫之用此予命題拈詠以望爾多士之至意
也是年

御試題是竹箭有筠松柏有心賦損上益下論五言八

韻詩卽

御製題一等共取六人第一爲桐城龍汝言第二爲婺源齊彥槐第三爲含山唐人最第四爲天津李大壯第五乃臣伯父士淦順天許椿頤則第六名也恭識於此以昭

榮遇

重榮樹返魂梅

常熟福山寺中有銀杏一株大可數畝後寺毀於火樹亦尋枯未幾僧人募化重修此樹復活士人美其名曰

重榮樹

見錄希道

光初阮

元

總督兩廣時重修書院有

梅樹百餘年物也礙於建屋命工人移之後院將枯死矣一夕大風雨不止清晨視此樹則依然暢茂阮因題爲返魂梅可與重榮樹作的對也

許抑齋

許抃齋少尉

祖益

華亭人也少時隨其叔父少萼太守

宦閩頻遊海上後官安徽署吾邑主簿有聲善繪事尤工松樹其法本於黃金吾而神韻過之先世父曾集杜句贈之云雲閒到處觀滄海天下幾人畫古松

半園主人

吾家自順治初遷定遠之爐橋鎮爐橋古曲陽治也地
平衍少岡巒先伯曾祖餘齋公歸田後卜宅於曲陽門
外後街饒有花木題其居曰半園自號半園主人今牡
丹數十本桂樹數株皆六十年物也公生平以廉潔自
持在都受業於寶東臯先生能盡得所學乾隆壬辰公
初捷南宮東臯先生謂公曰謝侍郎壩慕君久矣思欲
收君門下君盍往謁之侍郎文名藉甚若得其揄揚鼎
甲可望也公以爲在京十餘年於侍郎從無一面今方

通籍遂有干謁殊失平日所守竟毅然不顧未幾
試公卷已置前列適侍郎亦奉派讀卷以公不願在弟
子之列頗不喜獨抑置十名外以 朝考第八入館選
朝殿閱卷者例得爲師公引 見後謁侍郎大加獎
譽贈五古一章末句云當時海上琴大有成連在深以
不先往謁爲公惜耳公恬然笑之公官編修十三年始
開春坊

純皇帝知公名將大用矣復因不入故相和坤之門爲
所銜至己酉京察授浙江糧道又緣事忤和相未赴任

卽調江西後授河庫道終以鯁介不諧於俗引疾辭去
公門下士蔣相國攸銘玉尙書保皆尤著者也

植桂圖

先大父有植桂圖徐君怕亭所畫也齊太守模麓彥槐

題五古一首云淮南有珍木蜿蜒在山幽上枝棲鸞鳳
下根蟠蛟虬此種月中來人間安可求仙人斫其下丹
實落齊州先生得數粒偶然植林邱栽培歲月久葉茂
花復稠八月秋風來天香散書樓樓中讀書子折桂登
瀛洲何必珠作林何必玉作疇樹德莫如滋卽此良詒

有車馬
謀郅詵已青雲竇公未白頭會邀姮娥譙一醉三千秋
幽秀之語逼真王孟

皖省山名

吾皖據江之上遊叢山峻嶺山名同者最夥今特表出

之安慶府西有黃山潛山縣北亦有黃山

以黃魯直得名

太平

府西北亦有黃山廬州府東亦有黃山而池州府西南

黃山其上三十六垣實與歙之黃山三十六峯相峙按

歙之黃山本名黟山唐改今名高三千七百餘丈盤亘

三百里人之譚黃山者歙之外不知仍有五黃山也安

慶之黃山形如卧象當治湖之口故又名象鼻山而甯

國縣之南亦有象鼻山潛山縣北有鳳凰山宋王珪故

宅在焉而休寧縣西北亦有鳳凰山

一名靈鳥山

金聲讀書處祁門

縣南亦有鳳凰山

南唐謝詮
秉官居此

繁昌縣西北亦有鳳凰山

銅陵縣東亦有鳳凰山石埭縣南亦有鳳凰山鳳陽府

北亦有鳳凰山靈璧縣西北亦有鳳凰山和州白雲山

亦名鳳凰山則已有九鳳凰山矣和州有白雲山而潛

山之南太湖之東北亦有白雲山至東流之白雲山則

有洞可容數百人是白雲有四名矣安慶府東北龍山

其名最著而太湖之西有龍山

王荆公詩吾欲鞭龍起爲霖遍九州是也

徽

州之西有龍山東流之東有龍山太平之南有龍山徽州府之靈山香烟極盛每年有會朝山者以數萬計而池州之靈山廣德之靈山得此爲鼎足矣寧國府有陵陽山所屬太平縣亦有陵陽山鳳陽府有獨山所屬宿州亦有獨山而建平六安兩處亦有獨山休寧有東山元趙汭築舍於上虞集爲謨記卽此山也而黟之東山峭絕天半人跡罕到巢之東山相傳爲許由所居卽古之箕山盱眙之東山則舊名馬鞍山是四東山之稱亦

與白雲同若馬鞍山則更多於東山也安慶府西北有之滁州西南亦有之廣德州境內亦有之而霍山縣西北西南正西三處并有之尤奇也晉裴仙修鍊於青山之中草木秋冬皆青仙蹟昭然今桐城青山是已不知桓溫袁宏之遊青山則在太平府東南也青陽以山得名故青陽之北有青山也而與石印山並峙者又有建德之青山在古之桃州治者又有廣德之青山宿松之橫山在其北建德之橫山在其東南合之廣德之橫山天長之橫山又四橫山矣桐城浮山爲諸山之冠層巒

聳翠石洞連雲海峰先生文集中浮山記詳言之而肝
胎之山亦有以浮名者滁之豐山昔歐陽文忠所爲記
豐樂亭者卽指是山也而和州之山亦有以豐名者陡
山之稱見於定遠而盱眙亦有陡山涇縣之眉臺眉池
著名於眉山者也而無爲連曲如眉之山亦曰眉山李
白詩築土接響山頗臨宛水湄今寧國府南之響山也
而舒城六安之山亦曰響山桐城有大凹山爲平地突
起而廬江之大凹山復以形凹得名太湖之百藥山以
白香山命名而盛廬江之百藥山以李百藥所遊而名

建德有梅山舒城有梅山霍邱含山亦各有梅山池州有齊山廬江復有齊山石埭有歷山東流亦有歷山辨舜之耕歷山者至今紛如聚訟焉他若鳳陽滁州之并有蔣山繁昌來安之并有三山巢縣鳳台和州之并有八公山以及得勝荆山等名各有所同我國家統一函夏地大物博卽一省之山已可概見況按之天下之大乎

鍾馗

終葵二字見於考工記并玉藻不知何時訛作鍾馗日

知錄辨之審矣今則專以玄宗入夢之事屬之終南進士似更不經也梁山舟學士有題董旭終南進士圖云一人碩且儼兩脰偉而毳突兀升我堂白日吠狂獒咄哉唐進士入夢要皇帝科名亦偶然胡乃爲此厲爾家終南山捷徑一條在是中鬼所聚豈獨一方外其鬼多尖頭衣冠而軒騎不比俾禮多大可恣一噉市區萬餘鱗無地著妖魅公若伸指臂塞破屋子大鬱鬱非汝居齷齪非汝對門戶牀第間宵晝守毋怠狀貌各猙獰伎倆百狡獪徒爲羣兒黠反受鼠輩紿莫怪變惱羞髮植

齒齟齬主人亦同袍願告鍾先輩兩醜人豈知作偏畫
師畫遂令曲江仙而作鬼伯賣要當淬長劍下搜虛空
界先縛鬼董孤董旭以畫鍾馗名而筆墨甚惡撲殺此獠快遊戲之筆
足以解頤按詩後學士復成一短序云吾鄉陋俗遇菰黍之節凡高門大戶窮檐近市無不揭鍾進
士像於堂壁以辟惡厲甚至溷園之所亦有進士在焉
其爲狀也或嚼鬼肝吸鬼髓擢筋監腦又或刀之鋸之
敲之扑之窮極變怪靡所不至而鬼實未嘗不時時出
沒於青天白日之下豈人見之而猶慄者鬼見之而獨
不懼乎吾想天地間大鬼小鬼新鬼故鬼鬼生子鬼又
生孫族類繁夥不可負數鍾進士欲以一人而食盡天
下之鬼豈不難甚且所隨從者鬼役使者鬼跳踉蹌扈
於左右者何莫非鬼安知鍾進士當蒲觴一醉不轉爲
苦輩所鼓弄哉亦可爲愚且拙矣吾欲結椰車以送之
而其骨專車不能載吾欲漬目糗以享之而其腹彭亨

不可飽無已則莫若出下策以攻之斯時鍾進士必毗
裂髮指揪髯奮袂而去而妖麼邪魅失所依歸因是望
風而遁焉各鳥獸散未可知也吾既舉前詩爲鍾進士
解嘲復張此說於堂室窗戶間候天陰雨濕鏗青夜悄
時果有諸語出出嗟嗟醜醜者否吾將瞪目以伺之此
一則尤爲雅謔也 又唐溫庭筠容貌陋甚時人號爲
鍾馗日知錄遺
載并議於此

徐太守祭先世父文

先世父蓮舫公卒於道光己酉閏四月十二日五月赴
至京師余兄子箴方拜典試雲南之

命徒跣南歸輦下諸公錫以銘誄詩聯甚夥余曾鈔錄
副冊匪之篋衍兵燹後久已遺失庚午在嶺西讀六合

徐夔舟太守

蘇

未灰齋文集中有祭公文一篇傳體頌

文哀終榮始不減潘安仁之誄楊荊州也文曰維屠維
作軀之歲招搖指午之月某等謹具牲醪致祭於方公
之靈曰維蘭有芳焚而逾烈維劍有芒折之不缺英英
我公萬人曰桀幽關洞開蒙泉清冽八歲讀雅曰周公
作梁山晉望疑出依託

仁廟巡狩

召試多士獻冊河干

天顏有喜

賜列賢書作官中秘遂來荆襄盤錯是治白蓮天主莽
戎潛伏公殲厥渠弗株其族

帝用嘉之庸爾車服咨汝浙西秉鞭作牧歲在癸未民
漸於沔擗鼈以食產蠶及廬我公惻然告諸大府懲彼
吏胥蠲其全賦三駁三申大府積怒石塘甫修輪臺遠
戍祖帳峴南士民痛心公獨灑然賦壯遊吟曲礪通馬
懸巖挾龍公遊崆峒句劍倚絕壁篆鐫崆峒公有西至峒篆章逆回
鴟張殺我長吏四城鼎糜列戍烽燧二楊桓桓

國之將帥我公槃槃軍中掌記詩唱刀頭墨磨盾鼻伊

犁邊寒轉饒孔艱公告將軍後路形孱大營停運軍實
乃完冰嶺千仞凍裂人肌

天子有命改道濟師公謂冰嶺天險可恃準夷窺伺棄
之非計將軍入告遂格前議逆回繫轅論功釋愆玉關
生還優遊湖山有子象賢翺翔木天奠義躍酒羣季翺
翺孤臣餘生得此已足嗚乎鬼伯胡相迫促敷衽徬徨
敢告巫陽絕域殊鄉我公所傷魂兮歸來毋適四方荷
屋葯房我公尙羊糗糒餓我公卒嘗魂兮歸來欣欣
樂康嗚乎哀哉靈其尙饗計吾世父之卒邇來二十有

二年矣重展是篇不禁感泣又先師黃琴士先生

典五

輓公聯語云五年典郡二載從軍憶隻身由絕域歸來
教子盡成名方期書著蔗餘坐擁百城誇學富千里江
雲三春淮雨訪先生正落花時節贈詩偏愛我詎料舟
回菊所別經州日痛星沉蓋先生爲先公延至東流學
署濬師從而受業東流爲古彭澤卽淵明作宰處名菊
所蔗餘偶筆先世父所著書也先生與世父交誼最深
故吐詞悽切乃爾謹附誌之

論耶穌教

魏默深前輩

源

撰海國圖志摻採極博其論回教論天

主教詳矣特僅分敘事迹斥駁其書而於回教天主教
源流仍未能一一辨晰大西洋瑪吉士輯著外國地理
備考總其目爲五大州曰歐羅巴州曰亞細亞州曰亞
非里加州曰亞美里加州曰阿塞亞尼亞州歐羅巴除
回回國外其餘各國皆奉耶穌教大同小異亞細亞州
西藏印教門分歧曰儒曰釋曰道以及回回天主大秦
度等處星德亦作那內克趣向不同亞非里加教有回回有耶
穌有大秦等名目亞美里加原奉古教自歐羅巴人前

往始有奉耶穌教者而餘教亦復遵奉阿塞亞尼亞有
同教有釋教有諸神教有耶穌等教其說紛紜究亦莫
能詳其原始濬師曾細考之大要仍不出釋道兩途漢
使驃騎將軍霍去病出隴過焉者山得休屠祭天金人
顏師古注曰作金人以爲天神之主則不必遠引祆祠
之說可斷爲天主二字之始後魏書釋老志其始修心
則依佛法僧謂之三歸又有五誠去殺盜婬妄言飲酒
大意與仁義禮智信同泰西人紀猶太古事示十誠以
訓民教以事神天敬父母勿殺勿姦勿妄證勿貪財七

日禮拜省過誓則不必旁徵天堂地獄之說而斷爲拾
釋氏之唾餘唐建中二年大秦寺僧景淨述景教流行
中國碑有三一妙身无元真王按昇元經曰道有大法
得之立得是謂三一之道太上素虛經曰三一者一身
之虛宗百神之命根津液之山源魂精之玉室是以胃
池體方而受物腦宮圓虛而適真登真隱訣曰太極帝
君寶章者東海青童君授涓子以封掌名山涓子剖鯉
所獲是太上召三一守形也以朱書素佩之左肘勿經
履汙穢佩之八年而三一俱見矣三一者三元真一君

也授其封掌之教真誥紫陽真人受蘇君三一元丹之道則不必廣窮其開生滅死之說而斷其爲竊道流之宗旨不特此也三才圖會載吉慈厄國皆大山圍繞盤山爲城禮拜堂百餘所出金銀金絲錦富民居住皆樓臺吉慈厄非卽今之干絲蚡轉音乎建康寶錄吳赤烏十年胡人康僧會入境帝曰昔漢明帝感夢金人使往西方求之得摩騰名竺法蘭名來中國立經行教今法蘭西非卽本法蘭而名其國乎回教自隋開皇中始入中國西域圖志回人尊敬造化之主以拜天爲禮每城

設禮拜寺始生教主曰天主劉智

明江甯人

天方輿地經

東土西土中土自東至西作一直線自南至北作一橫
線兩線相交爲十字形天方當其十字交處今天主教
十字架非卽回教之支流乎天方經典凡我域中不容
歐若堂魏氏注歐若堂天主教也不知亞細亞州各國
所奉之教天主大秦亦所常有似歐若堂絕非天主堂
總之釋教道教回教皆在天主教之前彼蓋變化而出
之以爲不立新論則不能聳衆欲聳衆則非撇去釋道
回同一切門面語不足以見立論之高於是曼衍支離

患遂中於人心而莫之底止和議既定彼教遍行中國
愚夫愚婦從而習者滔滔皆是惟在地方大吏督率牧
令遇事持平據其理之是非化其心之畦畛更以其服
勸農桑興學校野無遊手家有蓋藏所以固結人心者
正不在刑驅勢迫也因閱海國圖志而一論之其他書
所述未見於志中及志中所載有於吾意不合并有舛
誤者附錄於後

外國所奉各教名目羅馬天主教加爾威諾修教
路得羅修教厄肋西亞國修教德亞古教疇馬爾回

教大秦教星德教那內克教巴拉馬教諸神教

地理圖考惟於高麗國志云士則業儒俗則崇釋幾
內亞國云或拜山河或奉禽獸各從其志

釋氏通鑑云河州東谷有一天寺常聞鐘聲當是天
主堂之濫觴

蓮池大師竹窗隨筆天說一云一老宿言有異域人
爲天主之教者子何不辯予以爲教人敬天善事也
奚辯焉老宿曰彼欲以此移風易俗而兼之毀佛謗
法賢士良友多信奉者故也因出其書示予乃畧辯

其一二彼雖崇事天主而天之說實所未諳按經以證彼所稱天主者忒利天王也一四天下三十三天之主也此一四天下從一數之而至於千名小千世界則有千天主矣又從一小千數之而復至于千名中千世界則有百萬天主矣又從一中千數之而復至於千名大千世界則有萬億天主矣統此三千大千世界者大梵天王是也彼所稱最尊無上之天主梵天視之畧似周天子視千八百諸侯也彼所知者萬億天主中之一耳餘欲界諸天皆所未知也又上

而色界諸天又上而無色界諸天皆所未知也又言
天主者無形無色無聲則所謂天者理而已矣何以
御臣民施政令行賞罰乎彼雖聰慧未讀佛經何怪
乎立言之舛也現前信奉士友皆正人君子表表一
時衆所仰瞻以爲向背者予安得避逆耳之嫌而不
一罄其忠告乎惟高明下擇芻蕘而電察焉

蓮池大師竹窗隨筆天說二云又問彼云梵網言一
切有生皆宿生父母殺而食之卽殺吾父母如是則
人亦不得行婚娶是妻妾吾父母也人亦不得置婢

僕是役使吾父母也人亦不得乘騾馬是陵跨吾父母也士人僧人不能答如之何予曰梵網止是深戒殺生故發此論意謂恒沙劫來生生受生生生必有父母安知彼非宿世父母乎蓋恐其或已父母非決其必已父母也若以辭害意舉一例百則儒亦有之禮禁同姓爲婚故買妾不知其姓則卜之彼將曰卜而非同姓也則婚之固無害此亦曰娶妻不知其爲父母爲非父母則卜之卜而非已父母也則娶之亦無害矣禮云倍年以長則父事之今年少居官者何

限其舁轎引車張蓋執戟必兒童而後可有長者在
焉是以父母爲隸卒也如其可通行而不礙佛言獨
不可通行乎夫男女之嫁娶以至車馬僮僕皆人世
之所常法非殺生之慘毒比也故經止云一切有命
者不得殺未嘗云一切有命者不得嫁娶不得使令
也如斯設難是謂騁小巧之迂談而欲破大道之明
訓也胡可得也復次彼書杜撰不根之語未易悉舉
如謂人死其魂常在無輪迴者旣魂嘗在禹湯文武
何不一誠訓于桀紂幽厲乎先秦兩漢唐宋諸君何

不一致罰於斯高莽操李楊秦蔡之流乎旣無輪迴
叔子何能託前生爲某家子明道何能憶宿世之藏
母釵乎羊哀化虎鄧艾爲牛如斯之類班班載于儒
書不一而足彼皆未知何怪其言之舛也

蓮池大師竹窗隨筆天說三云復次南郊以祀上帝
王制也曰欽若昊天曰欽崇天道曰昭事上帝曰上
帝臨汝二帝三王所以憲天而立極者也曰知天曰
畏天曰律天曰則天曰富貴在天曰知我其天曰天
生德於予曰獲罪于天無所禱也是遵王制集千聖

之大成者夫子也曰畏天曰樂天曰知天曰事天亞
夫子而聖者孟子也天之說何所不足而俟彼之創
爲新說也以上所陳倘謂不然乞告聞天主倘予懷
妬忌心立詭異說故沮壞彼王教則天主威靈洞照
當使猛烈天神下治之以飭天討

張爾岐蒿菴閒話云利瑪竇歐羅巴國人萬歷辛巳
來貢耶穌像萬國圖自鳴鐘鐵絲琴上命馮琦叩所
學惟嚴事天主精器簣耳越庚戌瑪竇死詔以陪臣
禮葬阜城門外劉侗帝京景物畧云然又聞瑪竇初

至廣下舶髡首袒肩人以爲西僧引至佛寺握手不肯拜譯言我儒也遂僦館延師讀儒書未一二年四子五經皆通大義乃入朝京師其所著書有交友論二十五言畸人十篇天主實義同至諸人亦各有論著分言理言器爲二種刻之曰天學初函又所攜書七千餘卷并未及翻譯所言較佛氏差爲平實大指歸之敬天主修人道寡慾勤學不禁殺牲專以闢佛爲事見諸經像及諸鬼神像輒勸人毀裂所詆皆佛氏之粗者誕者有答虞德口僧蓮池二書頗令結舌

亦一快事然其言天主殊失無聲無臭之旨且言天堂地獄無以大異於佛而荒唐悠謬殆過之甲申後其徒爲耶穌教會者男女猥褻幾與白蓮無爲等大非利氏之舊矣以此爲闢佛助儒何異於召外兵而靖內難乎要之歷象器算是其所長君子固當節取若論道術吾自守吾家法耳

張爾岐蒿庵閒話云耶穌教每月數日記天主剪牲陳饌隨其所有質之天子祭天地諸侯祭山川之義僭甚矣或曰貴賤雖殊皆乾父坤母而爲之子先王

制禮乃大有限制諸侯而下皆不得伸一獻以答生成於心不有歉乎曰不然天子園丘方澤所陳者皆四方郡國之筐篚田野細民之拮据也賤者修其物貴者修其儀普天之下固未嘗一人不祭天地也譬之事親亞旅耕田牧者豢羊豕雞豚庖人司烹宰婦孺潔器具冪酒醴奉而進之二人之前者宗子主婦而已餘人未嘗輒得至前也苟欲事天士大夫各勤其職庶人謹身節用以供王稅於義備矣因是而推斯民和樂之氣卽爲德馨怨恫之聲卽爲腥聞諸吏

腴民自養者卽盜竊天地神祇之牲牷粢盛而食者也利氏固解人當時何不以此告之

海國聞見錄東南洋諸番惟呂宋最盛因大西洋干

絲臘

卽干絲蚶

是班牙

卽西班牙

番船運銀到此交易島番土

產雲集西洋立教建城聚夷族原係呂宋土番按徐松龕中丞瀛寰志略引呂宋原係土番句節刪不清黃可垂呂宋紀畧云呂宋爲干絲蚶當是干絲蚶據呂宋地觀聞見錄及紀畧後載可知

海國圖志引趙氏翼簷曝襪記天主堂供天主如美

少年名耶穌彼中聖人也像繪于壁而突出似離立
不著壁者按建康實錄曰一乘寺梁邵陵王綸所造
梁末賊起遂延燒陳尙書令江總捨堂宇寺今之堂
是也寺門遍畫凹凸花代稱張僧繇手跡其花乃天
竺遺法朱及青綠所成遠望眼暈如凹凸就視卽平
世咸異之乃名凹凸寺今洋人用藥水映人像於鏡
中及一切畫冊望之無不凹凸隨形者趙蓋未知西
竺法耳

李衛改天主堂爲天后宮碑記邱嘉穗天主教論沈

大成讀通典職官其貶斥與楊光先同惟趙翼天主堂說頗有原委海國圖志均未載

王昶金石萃編謂景教碑西洋與大秦相距遼遠似不能合不知其地雖遠其教可傳如亞美里加州亦何嘗不因歐羅巴人到其國遂習耶穌教耶今之航海來中國者其相距不更遠耶昶又謂唐傳載波斯國俗似與今回同相同碑稱常然真寂戢隱真威等真字不一而足回同禮拜寺亦謂之真教寺似乎回同之教未始不源于景教其說更謬回同入中國見

於隋書景淨述景教碑在唐時天主教實從回教變
幻而出前已載明又謂碑稱景教景字之義與景星景
光流照之義相符是真三家村學究解高頭講章語
道書具在言景字者多矣和何以不一寓目耶

國子

周禮地官師氏以三德教國子此公卿大夫之子弟名
曰國子也左傳僖二十五年衛人伐邢二禮從國子廵
城掖以赴外殺之正月丙午衛侯燬滅邢同姓也故名
禮至爲銘曰余掖其國子莫余敢止杜注邢之正卿國

子後世以國子名官殆仿此馮惟訥詩紀古銘詞中遺
未收入

政由葛氏

蜀後主謂諸葛公曰政由葛氏祭則寡人葛氏之稱特
奇

容甫書函

汪容甫先生中乾隆丁酉科拔貢湛深經學以科名爲
不足重遂不求進取稚存太史詩中所謂不敢隨車試
大廷頭銜應許號明經是也先生恃才傲物多所白眼

畢秋帆宮保撫陝西時知先生名而未之見也一日先生忽以尺書報之宮保拆視乃箋紙一幅上僅書四句云天下有中公無不知之理天下有公中無窮乏之理畢公閱竟大笑卽以五百金馳送其家先生之曠達宮保之禮賢時兩稱之先生子孟慈太守喜孫爲先世父丁卯同年余侍先世父時嘗聞斯語云

管夫人畫卷

管仲姬工繪山水人物人罕知者先世父曾匪其海靈朝龍王紙本卷子長一丈餘島嶼蒼茫洪濤洶湧幅中

鼉鼉若者龜鼉若者魚若者蝦若者蚌蛤螺蜃若者大

而至於巨鰲怒蛟長蛇封豕

似江豚而圓黑

出沒隱現神氣勃

勃復有鬼怪騰踏波浪間若金銀若珠貝若珊瑚木難
或頂於首或負於背或捧以玉盤或裹以素綃爭作供
獻狀千變萬化不可思議令觀者目奪神駭而章法細
密傳染雅潔實爲收藏家不可多得之品宋三百年宗
室中惟趙仲輓妻和國夫人王氏與仲姬皆稱書畫名
手王氏真蹟傳者絕少仲姬所傳者亦只蘭竹二種若
此卷則世所僅見也世父卒后卷歸先兄子應先生咸

豐丁已春兄避兵亂居懷遠猶携以自隨未幾兄病歿
懷遠亦陷大約付之劫火矣高要何叔度元江上萬峰
樓詩鈔載管夫人墨竹畫并自書一絕云夫君去日竹
初栽竹已成林君未回玉兒一衰難再好不如花落又
花開歛署管仲姬寄子昂君覽叔度題云至今見者猶
銷魂何況泥裏你我人頗有風趣爰附記之

歛肩

後漢書張衡傳捷逕邪至我不忍以投步于進苟容我
不忍以歛肩歛肩卽脅肩也

盥頌

居盥獸名似蜎毛赤盥音襪山海經作居盥韓詩外傳
昔者舜觥盆無臙而下不以餘獲罪飯乎土盥啜乎土
型而農不以力獲罪麇衣而盥頌而女不以巧獲罪法
下易由事寡易爲功而民不以政獲罪

焦軒隨錄卷一終